



Aqqalu C. Jerimiassen
Atassut

UPA 2023/173
14. april 2023

Meeqqat piitsuussusaannut, ajornartorsiutip annertussusaanut aamma ajornartorsiummut qanoq iliurluni qaangiiniarluni aaqqiissutissaq pillugu apeqquteqaat aallaavigalugu oqallinnissamik siunnersuut.
(Inatsisartunut ilaasortaq Asii Chemnitz Narup, Inuit Ataqtigiit)

Oqaraanni piitsuussuseq, tassani namminermini oqaaseq taanna siammasingaatsiartutut taaneqarsinnaavoq. Tassami inuiaqatigiinni meerartatta qanoq inissisimanagerat ataatsimut isigissagaanni, oqartoqarsinnaavoq piitsuussuseq arlariinnut immikkoortunut agguarsimammat. Uanilu eqqarsaatigineqarsinnaasortaag tassaalluni, meeqqap misigissutsikkut, qinngasaarneqartarnermigut, kiserliortuunermigut atugartuussutsikkulluunniit piitsuunera eqqartorneqarnersoq.

Ullutsinnimi meerartaqarpugut, angajoqqaat qaakkut atungarissaartuungaluarpataluunniit qannartamikkut asanninnermillu tunineqartarnermik piitsuusunik. Akunnattumillu isertitaqartuusut tamani qimunnerpaasut nammattuunerpaasullu angajoqqaat, meeqqaminnut meeqqerivimmiititsisarnerminnut, atuareernerup kingorna ornittakkamiisitsisarnerminnut meeraaqerivimmiisitsisarnerminnulluunniit tapeqartitaanngivissumik inissisimasuniittunut, ajoraluartumik takornartaanngilaq, meeraat atungartuussutsikkut tassaasinnaakkajummat eqqungaasinnaasoq annertuumik. Isertitakinnerpaajusut meeraat tapisitinneqartarput, tassanilu akunnattumik isertitaqartuusup meeraat saniani usoruttaraaq, naak atukkamigut ulluinnarni pitsaanerugaanngikkaluarluni.

Meerartagullu pillugit maanittaaq uagut inatsisartuusugut inersuarimi oqallitsilluta, angutaasugut ila siulluunniutiinnarsuaq isaaniuttanngeqaagut, mattaalli eqqartorneqaraluarpata inersuaq tattoqillugu ulloq naajusallugu oqallinneq sakkortusaarfittaqaqisoq ingerlasaraaq. Taamatuttaarlu minikkusunnangeqaaq, uagut inatsisartuusut meerartatta nunatsinni sumiginnangaasernerat piitsuussusaallu eqqartulersillugu puigortuartaqarputtaaq aajuna; uagut nammineq inatsisartuni nukagasunik meeralittagut, aap! Uagut nammineq maani inersuarimi ilaasortaqaqatigut! Ajoraluartumik qiningaareernitsinniit inoqarfinit ungasinnerusuneersortagut nunakangasunik meeraqartut, oqarluannaraanni ukiumut ukiup affapajaa anaanaasup ataataasulluunniit meeqqani takunngissinnaasarpaa, aaliuna uaguttaaq piitsuussutsimut sumiginnaasarnermullu nunatsinni pissutsinut aaqqissuussisuuniarluta maani siuttuuniartugut.

Inuiaqatigiinnili oqallittariaasertaaq ataatsimut isigissagaanni, piitsuussuseq ilaatigut atornerlunneqarsinnaasaqaaq kamassamik inuiaqatigiinnut siammartererusaarluni. Anneraluarpalluunniimmi erseqqissumik taasariaqarmat, piitsuussuseq anneruleriartortillugu, illuanittaaq kamassaq anneruleriartortarmat. Tamannalu qinikkat oqarluartaallammaat tusaqusaallammaallu ila atorluartaqaat. Tassanilu sunniutigisartagai, assiliaq iluitsunngorlugu qiviassagaanni, meeqqat angajoqqaaminnit tusakkatik malittarpaat.

Piitsuussutimillu qanorlu nallinnartiginermik innuttaasut ikummatissamik kuerartutullusooq ikummassangassatullu piinnaraanni, naggataani soorunami meerartatta tamannattaaq malissavaat, maligassiuilluarnerua? Uanga isumanni naamik. Piitsuussuseq meerartatsinni aqqusaarneqartaqisoq qanoq taava aningorniarsinnaavarput? Inunnik isumaginnittoqarfimmiit tunniuttakkat qaffallugit? Meeqqat tapii qaffallugit? Pisortanut isumalluuteqarnerat suli annerulersillugu?

Imaluunniit akisussaaffik suunersoruna annerusumik oqallisigisariaqarneripput? Taavalu atugarissaarnikkut nikingassuteqarnermi inuttut imminut isiginnittaatsip meeqqat akorngani nuisappat qanoq atorniarparput? Illuani atugarissaarnikkut qaffasinnerusumik inissisimasuttaaq meerartaat qinngasaarneqarsinnaasarput nukatsitatut allaat taaniarneqarlutik, naak angajoqqaavi sulilluarnermikkut tamanna angusimangaluaaraat.

Immaqa piffissanngorsimavoq pisortanut isumalluuteqarneq qitiusumullu utaqqiinneq pivallaanngikkaluarlugu, malingassanilli inunnik pilersitsinissamut. Meeratagut eqqarsalersissinnaallugit; ”uanga allinguma imatut una malillugu inissisimalerusuppunga”-mik takorluuilersinnaalersinnissaanut. Tamannalu anguneqassappat sulilluarneq namminerlu iliuseqarneq aqqtissaasut, atungarissaarnerlu qilammiit nammineq nakkarunnangitsoq paasitinniartuarlugu. Tassuunakkut siunissami maanna meerartatta angusaqarluarnerullutik malingassaqarlutik inissisimasinnaanerat angujartuaarsinnaagipput upperinerusinnaavara.

Qujavugut apeqquteqaat aallavingalugu oqallisissiamik taamannak siunnersuuteqartoqarneranut, qanortoq oqallinneq naalakkersuisunnittaaq tigulluarneqarluni angusaqarfiulluarili suleriaqqinnissamut.